

Vun driweriver

erscheint auf www.lenauheim.de

monatliche
Erscheinung

Dezember 2013

von *Helen Alba*

Krischkindl-Owet

Am 24. Dezember han mer uns noh em Mittachesse immer bei der Alt-Oma getroff. Mei Schwester, die zwaa Gschwisterkiner aus der Schulegass un ich. Mir han gewisst, dass mer brav sin misse, weil es Krischkindl schun rumlaaft un de schlimme Kiner nix bringe werd. Meischt han mer um de warme Strohowe gsitzt, der Oma zughorcht, sie hat so scheeni Märchen verzähle kenne. Manchmol han mer „Rodi Gewinn“, „Durak“ oder „Schwarze Pheder“ gspillt. Bis es dunkl gin is. Dann sin mer voller Erwartung hemgang, for ufs Krischkindl warte.

In der Zeit hat die Mutter dann de Krischbaam in der vordri Stub ufgeputzt, selmols hats noch ke elektrischi Kerze gin. Die Wachskerze, die angeklist ware, sin erscht angebrennt gin, wann die Zeit war, dass es Krischkindl ans Finschter kloppt un de Pelzebock mit der Kett rasselt. Mir han als die Nas an die Finschterscheiwe gepresst un hans kaum erwarte kenne, dass es soweit is. Ware mer doch neugierich, was es Krischkindl uns bringe werd. Selmols han mer noch nit de Weihnachtsmann mit langem weissem Bart, roter Mütze un Mantel gekennt. Es Krischkindl war e Frauengstalt in langem, weissem Kleid mit weissem Schlaier iwerm Kopp.

Un endlich wars dann soweit. De Hund hat zu belle anfang, die Kett hat gerasselt un e Kloppe war zu heere. Mir han in die vordri Stub derfe un han de Krischbaam bstaunt. Iwerdem is es Krischkindl rinkumm un hat e große Zecker getraa. Erscht han mer bete misse, dernoh e Gedicht ufsaan. Wie es Krischkindl mit verstellter Stimm gfroot hat, ob mer a brav ware, han ich mer Kurasch ghol un geruft: „Mutti, des Krischkindl hat jo der Stahl-Oma ihre karierte Rock an!“ Weil der hat nämlich uner ihrem weisse Gwand bissl rausgschaut. Alli han gelacht, ich han selmols nit gewisst for was. Doch is die Begebenheit in meiner Erinnerung geblieb. Weil jo sovill zu bstaune war, han ich druf vergesst, was mit dem karierte Rock los is. Die Gschenker ware wichticher. Meischt war e Pupp derbei. Dann der gudi Vinga-Tschokoladi, dervun hat mer doch verkoschte misse!

Franzl- oder Salonzucker

Was wär e Krischbaam ohne Franzlzucker? Frieher hat mer ach manchmol Salonzucker gsaat. Ich han nohgelest un es werd gsaat, dass der Ausdruck ausm Ungarische kummt, weil de Krischbaam im „Salon“ steht. Und weil der Zucker in franzlichem, weissem Papier ingewickelt war, denk ich, dass bei de Schwowe so de „Franzlzucker“ entstann is. Des war in friehriche Zeite e Delikatess. In meiner Kindheit war de Franzlzucker so e Art „Fondant“ in verschiedene Farwe: weiss, rosa, hellgrien oder –bloo un –geel. Am Krischbaam han in deselwe Farwe ach Sterne, Herzle gebambelt. Un natierlich Nusse, die in Silberpapier ingewickelt ware. Später dann war de Franzlzucker „moderner“. E Füllung aus Marzipan, Vanilli oder Nussgemisch war mit Tschokoladi glasuriert un hat als „Franzlzucker“ am Krischbaam ghong.

Meischt hat mer uf Temeschwar fahre misse, um de Franzlzucker zu kaafe. Der is dann bis an Weihnachte verstopelt gin. Doch mir Kiner, wie mer schun greeser ware, han gewisst, dass die Mutter in der Stadt inkaafe war. Un han oft gsucht un ach gfunn: mir han dann verstholenerweis dervun genascht. Un bei der Bäsl Leni solls mol vorkumm sin, dass se am 24. Dezember, wie se de Krischbamm ufputze hat wille, fascht nor noch „Franzle“ geblieb sin. Es Schenne hätt sowieso nix me gholf, also hat die Bäsl Leni ausdenkisch gin misse, un des schnell. Sie hat Brotskorscht scheen länglich verschnied un in des Paipier ingewickeelt, so hat dann doch de „Franzlzucker“ am Krischbaam ghong.